



Broj: 01- *8M* /26

Sarajevo: 17. 3. 2026. godine

Šemsudin Mehmedović

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO:		17-03-2026	
Organizaciona jedinica	Klasifikaciona oznaka	Redni broj	Broj priloga
01-	50-1-	846	26

PREDSTAVNIČKI DOM
PARLAMENTARNE SKUPŠTINE BOSNE I HERCEGOVINE
n/r predsjedavajućeg

PREDMET: Zastupnička inicijativa za hitno pokretanje postupka preispitavanja zakonitosti boravka i rada te oduzimanje radne i boravišne dozvole stranom državljaninu Igoru Štimcu, treneru HŠK Zrinjski Mostar, zbog grubog kršenja člana 10. Zakona o strancima Bosne i Hercegovine, dostavlja se Službi za poslove sa strancima Bosne i Hercegovine na nadležno postupanje

U skladu s čl. 166. stav (1) Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19, 53/22 59/23, 87/23, 50/24, 73/24 i 56/25), upućujem zastupničku inicijativu

„kojom Službi za poslove sa strancima Bosne i Hercegovine iniciram da hitno pokrene postupak preispitavanja zakonitost boravka i rada te oduzimanje radne i boravišne dozvole stranom državljaninu Igoru Štimcu, treneru HŠK Zrinjski Mostar, zbog grubog kršenja člana 10. Zakona o strancima Bosne i Hercegovine“.

Obrazloženje

Strani državljanin Igor Štimac, trener HŠK Zrinjski Mostar, gostujući u televizijskom programu „Sport Klub“ 31. januara 2026. godine, javno je izjavio sljedeće:
„Želja mi je da ove godine naš HŠK Zrinjski osvoji prvenstvo, odigramo odlične utakmice protiv Palacea i uzmemo trofeje pred nama, **da naši Hrvati u BiH dobiju svoj entitet, da nam Hrvatska bude lijepa i ponosna i da vidimo manje ovih što mašu jugoslavenskim zastavama.**“

(Ova izjava je javno dostupna i dokumentovana u medijima.)

Izvor: <https://sportklub.n1info.hr/video/stimac-za-sk-u-hnl-se-ne-vracam-hajduk-nece-biti-prvak-boban-je-tesko-prozivio-kraj-prosle-sezone-a-zrinjski-ce-bit-kruna-mog-rada/>

Nesporno je da ovakav javni istupi stranog državljanina na privremenom radu i boravku u državi Bosni i Hercegovini predstavlja grubo kršenje Zakona o strancima Bosne i Hercegovine („Službeni glasnik BiH“, br. 88/15, 34/21 i 63/23), i to naročito:

- **Člana 10.** (Obaveza poštovanja javnog poretka Bosne i Hercegovine) kojim je propisano da je stranac dužan da za vrijeme ulaska, kretanja, boravka u BiH i izlaska iz BiH poštuje javni poredak, odnosno da se pridržava zakona i propisa, te odluka organa vlasti u BiH.

Javnosti je poznato da je stranom državljaninu Igoru Štimcu izdata radna dozvola isključivo po osnovu sportskog angažmana, odnosno obavljanja poslova trenera u HŠK Zrinjski. Međutim, umjesto profesionalnog sportskog djelovanja, Igor Štimac se kontinuirano upušta u političko djelovanje, javnu propagandu i istupe koji nemaju nikakve veze sa sportom, a koji sadrže elemente:

- podrivanja ustavnog poretka i teritorijalnog integriteta Bosne i Hercegovine,
- historijskog revizionizma,
- netrpeljivosti i političke radikalizacije,
- promocije ideologija i narativa suprotnih antifašističkim i demokratskim vrijednostima.

Napominjem da je zbog sličnih istupa stranog državljanina Igora Štimca u decembru 2025. godine sankcionirao Nogometni/Fudbalski savez Bosne i Hercegovine, što dodatno potvrđuje da se ne radi o izolovanom incidentu, već o obrascu ponašanja, o čemu svjedoče i novinarski članci sljedećih medijskih portala:

<https://avaz.ba/sport/nogomet/1003681/stimac-je-kaznjen-s-5-000-km-i-sest-mjeseci-uslovne-kazne-dobio-sest-mjeseci-uslovne-kazne>

<https://www.hercegovina.info/sport/nogomet/nova-kazna-za-igora-stimca-zbog-nesportskog-ponasanja/248654/>

Zakoni Bosne i Hercegovine jasno definišu svrhu i uslove boravka i rada stranaca. Svako postupanje koje izlazi izvan odobrene djelatnosti, a posebno djelovanje koje ugrožava javni interes, demokratske vrijednosti i ustavni poredak države Bosne i Hercegovine, mora imati jasne i odlučne institucionalne posljedice.

Tražim od Službe za poslove sa strancima Bosne i Hercegovine da postupi u skladu članom 96. stav (1) Zakona o strancima Bosne i Hercegovine - Razlozi za otkazivanje boravka, kojim je propisano da se boravak stranca u Bosni i Hercegovini otkazuje ako:

(tačka a) stranac ne poštuje javni poredak Bosne i Hercegovine iz člana 10. (Obaveza poštovanja javnog poretka Bosne i Hercegovine) ili preduzme aktivnost narušavanja sigurnosti Bosne i Hercegovine ili je član organizacije koja preduzme takvu aktivnost;

(tačka h) stranac u Bosni i Hercegovini boravi protivno svrsi na osnovu koje je odobren boravak;

(tačka n) prisustvo stranca u Bosni i Hercegovini predstavlja prijetnju javnom poretku ili sigurnosti Bosne i Hercegovine.

Također, zahtijevam od Službe za poslove sa strancima da zaštiti javni interes i ustavni poredak Bosne i Hercegovine.

S poštovanjem,

ZASTUPNIK PS BiH
Šemsudin Mehmedović